

perpetuis votis cupiunt, venerabile numen,  
 15 exoptant, servire volunt (mirabile dictu!)  
 remque laremque suum (tanta est tibi gloria iusti)  
 Auguste: iuvat ecce tuo sub foedere iam nunc  
 totum orbem post tot caedes, quas fessa gemebant  
 omnia, nunc nullo tandem trepidantia motu  
 20 Romuleis servire piis, pater inclyte, iussis.

## XII (a. 324/5)

Constantine pater, tu, mundi gloria, consul,  
 ecce tuo renovata dabis tot aperta labore  
 regna per innumeras gentes. mox rarus Eois  
 tot populis pia iura feres, et solus in omni  
 5 Augustus mundo sparges et in ultima numen.  
 sol tibi felices faciet spes perpete nutu.  
 ars bona iustitiae et divum vicina decori  
 largi dona boni caelo capit. influit illuc,  
 vota quod optarint pietatis. cana subivit  
 10 sancta Ceres; tellus reddit Bacheia lapsa  
 rivis dona suis; non Euri e flamine turbant  
 enormes pelagus; stat mitis principe noto  
 res per iusta vicens oris, qua signa Booten  
 ultima consocia tollunt in sidera dextra.